



15. Oktober 2019

UKA 2019/33 -53
Aqqalu C.Jerimiassen

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni §9 imm. 1 allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni meeqqat illugiimmik angajoqqaallit, tamarmik sulisimappata imaluunniit ilinniartuuppata, kommunep ulluunerani paaqqinniffiit ulluuneranilu paarsisarfinnut utaqquisut allattorsimaffianni meeqqanut kisimiittunik angajoqqaalinnut sulisimappata imaluunniit ilinniartuuppata assigiimmik pineqarnissaat angujumallugu.

(Siumup Inatsisartunut ilaasortaaitai)

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisip allanngortinneratigut qulakkeerneqassaaq, kalaallit nunani allani ilinniartut qitornaasa kommunip meeqqeriviutaanut ulluuneraniluunniit angerlarsimaffinni paaqqinnittarfinnut utaqquisunut allanut naleqqiullugu sallinngortinneqartalernissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu.

(Inatsisartunut ilaasortaq Malene Vahl Rasmussen, Demokraatit)

Siunnersuutit imartuut pingaarutilipilussuillu! Laura T. Uitsatikitseq aammalu Malene Vahl Rasmussen torrak, qujanarluinnarpoq taamak ittumik qulequttamik saqqummiussa qarassi. Meeraqarlunimi suliaasaq annerpaaq tassaavoq, qaqugukkulluunniit meeqqat salliujuaannarput, maani inersuarimiikkaluallartuuta nunatsinni oqaluttarfiit ataqqinarnersaannik taasakkatsinni, meeqqagut qanorluunniit pingaarnerpaajuarpur arlaatigut pisariaqarluninarnikkut salliutissallugit.

Ilalimi meerannguakka inuuninni tamani pingaarnerpaat qasseriarujussuarlunga meeraaninnguini pilliuteqarfigaakka illoqarfimmiik illoqarfimmut nuttartariaqarnermi periutsit eqarnerujussuisa pianik.

Siorna Nuummut nuukkaluarninni ilaquttakkalu, meeqqat utaqquisuni inissisimanerat ingasaannaruttormat nuliara suliffittaarsinnaasimanngilaq meeqqat utaqquisuniimmata paarisariaqarnera peqqutaalluni. Imami ingasatsigisimavoq erninnguara marlunnik ukioqarallarami ukiup affaa meeraaqqerivimmut utaqqisitaavoq inissarsinissamut, soorunaana angerlarserluni ilaqtaminullu kipsisalluni pissusaa sakkortorli.

Nunamiippugut systemimik immitsinnut aqqissuussiffigisimalluta qanoq inissisimanerput malillugu pillaatissutullusooq inissisimalluta. Tassani taarusuppara, meeqqakka assersuutitut ataqqeriarukkit,



paarinissaqanngimmata nuliama paarsinermut piffissarujussuaq atorpa, taamattaarlumi kingunearpoq, systemip ajornerujussua peqqutaalluni, uanga illuinnaani kisima pilersiusutut allaqqasariaqarninni utaqqisuni kisitsisarnerni suli kinguaraluttuinnartutut inissisimatinneqarneri. Kamannartanngittuunngilarlumi, inuttut sulerusuttuulluni, isumalluuteqarani inuunissamut perorsangaalluni suliniaraluarluni systemitta ajorneruata sulisinnaajunnaarsaraangatigut.

Takorloorneqarsinnaavorlu angajoqqaarpasuit sulisinnaajumallutik allatut ajornartumik qernertuliorneq atorlugu, inuinnarnut nalulluinnakkaminnut paarsisitsisariaqartarsimasarnissaat. Aaliuku namminiilivinnissamik aqaguagooraannaq ilaatigut suli partiit ilaat anguniagaqartuurtut.

Isumaqarnarsinnaavoq, maanna taamak annertutigisumik utaqqisunik peqartilluta, siunissaq ungasinnerusoq isigalugu meerartatta atugassarititaat pitsanngorsassagutsigit arlaatigut naalagaaffeqatigut suleqatigeqqinniartariaqarigut. Sulianummi annertuunut maanna naqissuseqqittareerparput naalagaaffeqatigiinnerup iluani qanoq suleqatigiilluarsinnaanerput, qanorluunniillumi misiartingaluarutta naqissuseqqittaraarput suli naalagaaffeqatigiinnerup iluaqutai.

Meerartatta ikiorneqarnerunissaat piniarlugu partiit amerlanguartuulluta naalagaaffimmut saaffiginnissuteqarnissarput suliarereersimalerparput. Suummita tullinguuttut aamma ugartorsinnaavagut maanna? Nunatsinni meeqqeriveqarnerput meeraaqqeriveqarnerpullu pillugu artorsarnerputtaaq nassuerutigisinnaanerparput? Utaqqisut imaaginnalivipput, nunaqqatigut Qallunaat nunaanut nussortuarsinnarput. Ilinniarluarsimasut uterniaraluarlutik meeraat inissaqanngillat meeqqerivinni meeraaqqerivinniluunniit, soorunaana ilinniariarsimasut meeraqalereersimallutik uteqqinniaraluarnerminni nangaalertalik. Nunaqqaterput ilinniariarluni aallarpat tamatta akileeqataaffigisatsinnik uteqqiganilu assigiinnarpaami qummoroortitseqattaarujussuaannarutta angusaqaratalu.

Eqqarsarluqaqqaarniarta tamatta maanna killiffitsinni, meerartatta sumut killitsinneri ullumikkut eqqarsaatingalugu. Utoqqartagut “inuuttakkaluttuinnaraluartut” qaqungumorsuarmut naatsorsuutigisinnaanngilagut, oqartoqarnikuuneratussaarlumi nammattuulertussaasorpannguusugut ikinnerulertussaavugut, nunaqqatigut akileraartarnikkut iluaqutigilluarsinnaasagut siunissaq ungasinnerusoq eqqarsaatigalugu aqutissiuttipallattariaqarpagut piaarnerpaamik.

Taamak Atassummiik oqaaseqarluta siunnersuut taparserparput ataatsimiitsitaliamullu susassaqtumut innersuullugu.